

四庫全書

集部

欽定四庫全書

集部

弇州四部稿卷一百二十五

六五

詳校官侍讀學士

臣陸伯焜

中書

臣劉源溥覆勘

總校官原任中允臣王燕緒

校對官庶吉士臣陳墉

謄錄監生臣章裕曾

欽定四庫全書

弇州四部稿卷一百二十五

明 王世貞 撰

文部

書牘二十八首

上朱大理書

某昔者讀柳子厚上崔大理啓其為文益千餘言然大
要不過求遇已耳某既以高其文竊復卑其人以子厚

之才不稍自貴重，蘄識於崔公。即才若子厚，崔公不先識之，而使其匍匐自獻，某以為罪在崔公也。攷唐史，卒未見薦。子厚則茲啓亦贅疣耳。夫不能愛人之才，與不能自愛其才而輕售之人，其失均也。某少歲粗曉窺弄筆墨，使得解去，既釋褐，從諸薦紳先生後，多所覩記事，事觸感消沮，用世之志，加以行能鄙劣，習懶成癖，不敢與今儕輩競。晉顯退而思欲效尺寸於古人，俛俛焉若師，瞽無相，跬武枳棘而不得舉，乃幸以職守隸門下執

事者不以他屬吏視使薦敝帚且為游揚之悚愧何以
得此於執事某之文不能望子厚萬一執事之賢崔公
不能望萬一彼所有者某則無之然而彼所無者某則
不意其有也某之周旋棘省幾滿歲矣執事之御閤者
某不一二面焉執事方吐沫延攬而某縮焉如畏豈直
以勢分懸隔不敢以不肖之身勞尊者降接亦妄意束
髮讀書果為何事既鮮先哲之長迺效其短耶執事不
以督過而惠教之詩云采葑采菲無以下體君子下體

之愛至矣某直不敢當耳抑某聞於穆叔其次立言去德功為品三也假某能為子厚亦子厚耳有子厚之文執事之愛必更至使子厚求過其文執事未必取也顧距今竊祿之載衡畧未涯萬一少進磨策駕鈍或有所見以無負執事亦願執事推愛某之心愛天下之勝某者而已同年李光芳濮人刻意五七言律邇時名家不知合致誰左坐使事故尚未及侍下風其所謂勝某者不敢隱也

與陸浚明先生書

遠辱寄高文讀之至再三不作一今人語又不襲一古
人語抑何奇也某所知者海內王叅政唐太史二君子
號稱巨擘覺揮霍有餘裁割不足執事之文如水中之
月空中之相不落蹊徑不窘邊幅僕間與吳峻伯論之
謂正統在執事也吾蘇作者後先固不乏何至掇六朝
諸公之敗縷結鶉聯絡而成章僕私心怪之以為如閭
門市綺帛得三尺頭面耳不直一鐸也僕少執事三十

年總角時見家君論當世人首屈指執事私心慕嚮之不減於龍門之馭既幸取進士亦謂尚及壯時思有所見於世而疎懶之癖切入膏肓跨馬候謁達官如使絕域顧同事者面頰流汗少小作態不自梳櫛後不復能梳櫛朝起假手僮輩抑按之甚苦便欲盡削去髮執事謂此人者果可見於世耶西曹號冗散而訊謀未及清晝晏坐間亦有文字之好捉筆一二語既讀之便自羞毀去且未及登執事門何敢便操鉛槧柄執事謂僕多

所述作所傳妄也

又

伏承太夫人奄棄惟是純孝推戚曷解太夫人上壽令
考越有聞嗣奕於再世其何以憾焉執事宜抑嗇毋令
過禮僕羈守不得歸致生芻之拜謹南嚮盥授不腆薌
幣伏惟鑒入之前月曾辱寄左氏鐫幸牘少間假休沐
卒業頑鄙未窺見一二然於援證核駁無假累紙疑義
躍然痼癖頓洗真漢廷老吏筆也當令盲老公心服地

下矣所諭孤樹裛談乃閩人李侍郎集聞已托梓人僕
向從袁履善處錄之比舊十益五六大抵多間巷不根
語閒中妄欲刪定既復自嘆此不過增眼目一重魔障
畢竟何益執事但從履善索之見當自厭也

陸子傳先生

某於公通家子弟行也曩叩玄亭阻應門悒悒而返自
後且不敢以塵土案牘之身廁穢大雅納刺慙却數矣
居平見京師事不可眼與一二知己拍手論吾先生蟬

蛻汚濁翔于千仞羅網滿地孰得羈笈聞開卷之暇頗
往來文氏布袍玄恰凝塵湛然賈其餘力要使鍾顏三
舍丹青戲遊真宰上訴奇哉歸也近從射陂草堂覩其
人固世緣未斷翰墨清妙亦一時名手再致聲執事甚
切也

答徐以言

自執事有伏闕之疏不復聞問者十四寒暑矣雖凡羽
弱鱗不足復溷龍章鳳姿區區仰止一念則何嘗不旦

夕焉自以先大人方履危制命炙手不欲傷當事者意擬走一介候蹤跡稽顙之間而竟次且不敢僅從越中人得起居無恙有加額而已然區區竟繇容城君故被萋斐而先大人復不堪其齟齬時時相左遂中奇禍至今日嗚呼先大人已矣某不孝不能代歐刀北闕乃以宗祀之故勉強偷食息亦何顏稱人於天地間哉即死無以藉口地下不死而如曹蜍李志厭厭無生氣何為也人於生死亦觸藩唯谷奈何奈何近者元亮褫斥小

豎遠成執事之道已行海內方日夜覲東山之召以大
吐未竟之蘊而不忘窮谷草芥手書慰存且訂盟五湖
三山為日以待執事高誼宜爾僕雖欲躡芒屨操瓢笠
以從山川之靈其肯令不孝之子辱長者杖屨哉茲因
蕭丞便附言鄙悃外三詩聊見野人之獻耳不足存也
勉旃良飯自愛

復馮汝成書

執事握文柄首善之地青衿在門桃李在朝甚休甚休

世貞曩承乏貴郡諸罪狀非一致大禍於先君子自奉諱來不為人間人久矣即以衰慈戀戀先魄淺土勉理綫息生死之際時復觸藩雖教鐸比壤餘光衣被不敢一通尺素於長者之側乃者僂舟過吳馳使下問惓惓副以腆貺昔人所稱薄雲天之誼今復見之矣所諭志事及下貽藝文一局悚息不足當來命之辱嚮者以公之大教為太守李侯謀之使浦子司其事鄙薄不量竊亦欲附借不朽及覽浦所結撰固自勤論著往往未

合作且多挂漏意大加刪定而官居無攜書足考公時
甘棠西土自賢兄外少可與商者又案牘乘之居無何
家難作矣肝腑小蘇間及往事輒汗簌簌下以公良史
不下左丘草一齊乘發不百一而足耳何所資不佞也
藝文極備且精核真馮氏碎金僕安能措辭哉無已則
有宋後詩微勞雌黃乎于鱗見贈叙文已收入尚有顏
城碑一篇又僕有兵備道閱武堂二記碑陰一銘及祀
岳君寵趙烈婦二文似可備采擇者僕非敢言文於齊

事小有關耳盧柟賦得一本如命上之子相集太煩僕
曾畧節其詩今附覽吳邵武書來云亦為小刪之擬梓
於郡矣近體一紙多絃絕不成聲者覆瓿可也賢兄豈
難涑水哉世乏伯樂不能於驪黃外拔千里令人短氣

答李伯華少卿

令親至承手教及示二誌知遣信者再俱為洪喬浮沈
悵然先君子大禍實有為之者嗚呼何忍言哉世貞自
奉諱來飲血枕塊分填溝壑四易寒暑矣以老母在不

即死戴面皮見人然亦何意塵世家有先人遺籍雖不敢望公家二酉宛委差足送餘日而摧裂之餘志意荒落開卷茫然無可措者死生之際大都觸藩灰坐一室亦是阮籍窮途公覽之不一損道心否二誌縱橫萬言纖曲俱盡愚谷巧於用短公無乃巧於用長耶女郎諸山秀出吟屐無恙時時令齊風颭然惡詩不足言第見懷仰之切耳醵寒強飮自愛

吳叅議

閒時嘗讀列仙傳恨太苦寂寞公所統諸洞天與塵界絕金紫呵從烟霄日月邊乃知寰海內自有一種富貴神仙也公前身想是玉皇香案吏耳

何侍御

京邸一再手刺不得達閣者過檀家君為某言執事遂見念二孺子矣此何以當也不佞聞使節東行部霜雪之下無廢陽春三軍殆挾纊哉溫泉殊聞勝驪山湯無硫黃礬石之苦差足養性且執事為東道主不一奇快

適從中丞公醉歸腹痛畏行惻中止耳不以僕愚足侍
杯酒之歡惠然而過我誠所望也

周盾昌

信來辱手教垂念良至發潞河時亦欲取道一過京東
而不可得知尊懷乃遂同之矣承諭欲移病請告世路
洵洵吾輩第一著也執事豈以僕非人哉青州雖十二
之國然其人曠疏好亂桴鼓晝起大費將牢執事不以
見憐而以見美何也

董侍郎

昨以舟過石頭不能伏謁長者而從吏以手刺賜誨適
偶有聞於輿人輒效一得之獻脫畧無次誠不知其未
同也乃復拜大教慨然有澄清天下志且痛士習憂民
風有味乎言之矣今中外稱伉直立奇節表表者不過
四五公而就其間當名實洞表裏慎終始若百煉之金
絕瑕之玉而無可議者則莫如明公明公一日大拜廣
夏細旃之上一旋轉而海內嚮風若動貴減騶於文簡

邊徼戢兵於司馬固易易也不佞所重為明公祝者願
明公少含弘其介冲融其辨使薑桂微溫芻蕘得進而
已大教又謂僕亦嘗被狂放不檢之譏而識者以為不
然此自明公愛忘其短耳僕少年時與三四友人習雕
蟲之技奉職粗理不從權貴乞功名便以為足標榜自
是報施多簡中遭大慘形神都廢禪除之後時時以酒
寬之幾遂成痼平生賴先人饘粥之遺獲苟遂其志而
所識窮乏不少邇來忽動移山一興及頗收買書畫至

減仲產以此愧心第為狂為放不敢為不檢耳所謂大將軍幸保持之明公試觀不才豈堪有為於世者耶吳興稍一挫墨吏持巨室洶洶至今僕何垣壁而敢希明公作用試事畢乞歸當徑造門下請教不一

瞿師道

側聞晉典綸綍不廢史管當挽復淳古與七制並隆甚至幸也天子方大處分聲色無動而又開閣延經生侍青禁明去留之旨杜窺覩之萌遠方波臣靡不滌耳奉

宣德音況執事居禁近之列者乎某別後八月始抵家
得一及送老父鎮日酬應寢溲俱奪筋骨不聯龜勉復
出與成侍御了此段苦事所經由淮以北望清源千餘
里亡不陸沈者邑之民僅免魚鼈易于析骸亡但象見
又黃河別延浸漫漫成巨窪運河頓長土若平地此喉
咽也患已剥膚矣節鎮諸公日望遷為一身計則可如
天下何弟非與於此者不忍見耳外拙作奉寄如左

袁抑之

別日抵潞河已二鼓矣踰旦乃發舟水頗駛鳴榔伐鼓
前後應答楊柳蒹葭微寒自生隱然江南景也始者自
適退而愴焉知己朋儕無復在眼縱復烹鱸湛醑誰行
賞此閒中憶記兄白簡息而誦之不覺商飈颭然而四
來也監軍新命于役北陲令人慨然有封狼居胥意丈
夫得志要令盾鼻上磨墨奈何齷齪效吳子輩為也出
塞歌思勃勃爾稍南暇為兄一掃軍中宜慎保霜露此
行極大機括智者沈幾萬勿輕動僕非能知此者於兄

效骨肉之愛耳

又

別後再作書及一詩償宿逋悉達否望長安片紙不得
諸君信忘之也知往返軍事良勞苦雖不獲著袴襦
上燕然操如椽筆權豎內消獯鬻遠塞茲行頓若游覽
矣弟命薄書生懊惱作獄吏不已又令出與屠創伍黽
勉畢役趨故鄉恨不併日生來劣志願從鄉里老人酒
社中作役不願作公卿門貴客也時事大異勉樹勛猷

幾微之際願吾子自防勗之耳

又

不幸遭禍來即生平號故人相知者往往削跡自引去
乃獨再辱足下書毋論書已所以慰誠指示靡不肝膈
也入與家大人言之即相對泣涕者再矣僕雖已罷官
貧不虞索鎰而足下祿入故尚薄胡重推食念我且厚
也念足下餉不當受受之以足下高誼愚父子所坐深
居閒無地營救間一侍徃徃還輒閉門與老母弱弟吊

影歎息青燈熒熒風雨時送出人間世所無憂怖即教
稱緣業當不知前生作何狀也第主上多竹宮之祈符
瑞臚奏竊可希覲首領回光之燭杳然未期足下所治
多赫赫直聲在朝稱屈載道栖遲紫薇堂中與諸君雅
歌浮白不啻上司徒公也豈其食魚必河之魴勉旃自
愛吳生在屬中頽脫否

答楊中丞

不肖嚮者強起躑躅三輔間幸與金晉接壤每一望旄

麾啓戟槎牙於太行白雲不勝其注仰而自唯禮數隔
絕徽音濶遠不敢輕易輒通其私茲聞移疾乞休方在
疑駭乃承手書下問副以厚貺始得從徐駟卿備承起
居之詳雖玉體少違而豎子遠遁今中外之望屬明公
一人南陽龍卧恐未便穩也新詩清遠孟襄陽遺韻近
亦當伯仲蘇門竊意明公之貌當如服氣餐霞之人憑
虛欲仙不宜作虬髯虎頭顧盼也太史公致想慨於留
侯得無類是耶弟荼毒餘生十年草茹先事苟白扣匄

角讀遺編足以自了而橫為造物者所戲兩疏莫遂折
腰鞅掌茲獲量移復擬乞骸而上書者為盜憎委頓而
返此行真畫蛇添足可歎可歎承見需全稿實未就剗
刷有三四種聊以資抵掌冗次不悉所懷統唯台亮

翁司馬孺叅

世貞無似嘗辱從公寮末而公國士我又辱稱公之州
民而公覆翼我迨謬起稱公之下屬吏而公復故人我
拜辭之夕握手為歡使蘇壤登於華席槎蘂被以春芽

伏謁之軀恍若驟貴既幸游公之鄉而一水間隔不獲
登堂僅再遣候尊居起居而已僻處吳興菰蘆中無可
通使者秋間一布尺書非幣於族子鴻臚定鼎所不謂
其自淮而歸竟成洪喬故事及冬而請假裹先窆奔走
不遑寧處仰止之懷與日俱積間從邸報見公所上流
民圖疏為之北嚮加額老臣惓惓格天之忠不知九閭
遂无阻否世貞既強出從事亦欲少策駕鈍以報知己
而廟堂之上氣象乃爾且半殘人也安能復仰中貴鼻

息已具疏乞休獲奉一帚先寵侍老母菽水以送餘日
於分過矣天下事須大力人負之雲霓山斗之望既屬
我公自不得下同微末運河國脈當極勞神冀平成在
通宅揆有期尚容嗣賀從子進士一誠行聊附言區區
統惟鑒亮春氣漸和為道為天下自愛

與潘中丞書

扁舟顧訪東海雲霞為賢者增色華琛異味稚子詫傳
以為希邁至月下浮白嘯傲成小祇園一種佳話矣惜回

風不辭無由操豚肩斗酒追餞於吳閭之傍此歎尚邑
邑耳舍弟北首送之至晉陵已別令蒼頭上乞骸之疏
幸憐而獲請半殘之軀尚猶不屬人也見傳代翁中丞
玄圭之錫舍我公其誰天下事須得天下真才勉旃自
愛勿作區區兒女子戀也扇頭詩雖叙安期千里之致
然尚理前語與公爭五湖不當復瀆鈞覽妄謂公雖高
牙大纛間菰蘆布颿之興當猶故耳遂不獲躬報謝似
未能免俗唯高明寬之

劉子成

別後抵潞河信宿解維水駛岸濶棹歌相發湖海之景
便在目前也所惜者不與知己共之耳見贈六章乃是
開元作手非吳子輩可擬僕則既私喜且幸矣因於足
下竊效微規古人業鮮兩至名成在專不朽之業唯此
一舉可以自力其他大半由天由人足下少息而跂之
便足垂世慎毋令刀筆吏稱慕也

又

往固草次知兄雋才且辱國士之照因以微規代謝亡
見罪否僕之南也謂得少憩息山居可以屬意昨者抵
家僅月許公私頓迫食寢都廢又坐期逼星夜走淮南
會成侍御十七日役畢使復南不擬作兒子應酬矣譬
如釋氏斷絕種種一切世人謂樂却以為苦必斷絕之
我既謂苦安得復樂此耶周歲後可藉手見足下狂奴
故態重心賞否窮寒北望黯然興懷想同之矣

又

辱手教知抵家復邁西河之戚莅鎮已久威信境外為
慰苗類獷悍好動難制亦具人性古有三年而克者乃
亦有七旬而格者要在足下自擇耳僕自昨秋中寒兩
作遊岱幸不見籍輾轉之際放下世味一切無與唯念
去日鹵莽虛負生理乍得餘年便擬堅入雪山斷臂穴
腹無復顧念今而更悠悠故吾可惱可惱足下知公實
逝耶造物小兒半道弄人僕亦幾落其手公實故緣薄
耳順德守非不大佳直少却世人一段薦牘寥寥政是

本色僕夢刀未遂聊復陸沈簿書豐草長林蓄之久矣
為老親方履虎尾不得恣然奈何東南之變不意一至
於此三吳無尺寸乾土宗黨交游大半異物僕亦無羨
生者早晚等耳使回促書甚急據案草率數語殊不詮
次風塵之際哲士竹帛愚者礎斧足下勉之

又

自杯酒燕市時于今二紀餘矣待罪楚臬值門下儼然
在疚而貞坐所守不能躬束芻之敬尋又逐除目而東

悠然之懷彼此托之郵筒而已鄭襄之役其不以余孱
授之蒲弓葦矢俾卧治焉乃又以隙日畀我果獲從事
鉛槧隄於息黔矣甫擬走一介候門下安而使者乃首
之叙睽合之悰導契濶之故且以不佞先二子鳴即文
運不百六為媿快夫僕何忍言哉業上書乞骸旦夕待
報具區之陰有菟裘在二子誠如公言雖然所謂馬則
吾馬齒已毀矣追唯門下持節淮陽以一白羽掃島虜
若秋葉太阿之鋒既血飽而匣閤之能無啾然鳴也五

單于雖面內然時時見惡氛幸善飯自消息即一撫輦
不能舍廉公矣太公不朽之寄焉敢以鄙陋辭第所著
狀者吳楚材何如人也而能為于鱗言其鼓脣若啓噓
而齧牙斷斷然于吻間有流味也則誠楚材也雖然竊
以為公口授之耳所示順甫誌銘精簡有法順甫不死
矣撲如云公且為含其歿者而卹其存者此自公厚德
亦足為末俗勸其它具別啓中非日專候更布區區

復戚都督書

某向則聞東南諸名將亡隄公者又會前兵使陽曲王
君雅能道公用兵狀出紀效新書讀之以為縣官即早
用公何至吳越財賦之地如甌脫哉而無何伯玉中丞
復書來云戚公今韓白也雅欲得足下言足下能無意
乎不佞竊亦以倭事起首尾十二年環東南且萬里所
殺傷以數十萬計糜大司農金錢不訾僅得一戚公耳
如戚公真能戰者以故不自量其愚輒詮次鄙見為序
序成而中丞使復來遂授之既殊自愧悔以下澤之乘

輒逞足於晉廐三逐之媼徑街顏於楚庭縱二主憐而不色怖之獨不貽閹人笑哉及使啓械再復公書所以獎予不肖甚勤拳篤至若真有味乎僕言如伯玉指者載覽別集諸縉紳大夫紀豐功於金石如甌如楚如閩凡數十百戰則又愧僕叙之未悉也乃公則欲然不自喜精求性命以希太上僕何敢望焉僕何敢望焉夫僕自束髮來即知操鉛槧之業於今二十五年矣近竊窺公之用兵而稍有悟於文夫文出於法而入於意其精微

之極不法而法有意無意乃為妙耳以此印證於公公
其許我否漳潮兼閩近格所希公不得不於格外仰報
此賊如復平鯨波盡偃南天若濯侯印焉能更利敬當
釋耒以俟飛捷南牀萋斐伯玉賴公是在廊廟間不過
六月之息第國家無以使勞臣耳事迫則蹻跼生爪翼
事定則夷齊蒙垢膩嗟嗟寧獨一伯玉哉偶公見示及
之不覺忘捫舌矣沈嘉則快士也足備藥籠中一物否
承損華幣玕錯種種充庭使我不知所裁又懼勞使者

往返勉拜賜極切愧悚外具乃野人食芹之私一詩書
扇頭願效高山之仰非足奉酬來美也幸亮而納之

又

與公別恍然自失者久之海內故有人如所謂生不願
萬戶侯者尋用沾沾自喜矣茲時計已登大將壇如公
向所云廟堂之上必當大聳動第官府漸二臧否異同
調停智力俱困矣恐無能為九萬里扶搖者舍弟業已
行殊悔強遣之令後世謂僕愛弟不如其自愛之深也

欲作贈公詩為酬應所苦僅成一章書扇頭奉上庶幾
出入懷袖間耳募兵議成執事乘六飛傳道吳閭僕尚
能操舴艋奉斗酒豚肩相勞也春氣初和強飮自愛

又

春時傳聞非一自信以為必無而事類投杼幾廢寢食
後審知其無他固知精忠所格豚魚為信然亦君相明
詰宗社之福也僕疾鍛餘生甫離禪除誠不敢遽及膏
沐以希恩澤而忽有楚補久之乃知當事者似猶以雕

蟲知我區區行藏動若隔世頭髮盡改手板猶故且令
褊襪觸暑我珂凌風生人之趣都不復有何況作官特
恐重得罪於簡書聊一染指即圖拂衣耳江陵相公誠
可謂社稷臣其在翁培植非淺為渠尊公徵言固區區
所願執役者所慮班倖之門難為工耳見答兩儀七曜
語竒絕竒絕第言大非吾任也汪司馬經畧以足下當
之所條上必十世利當不至作趙營平數遭駁難也諳
達聞已逝黃鬚兒必解組此在探得其情用南北單于

縻法而已然無事而飭兵不若無事而庀財財即兵也
老書生談及此頓覺技癢幾欲投筆公得無一撫掌乎
貺存種種過渥拜嘉多愧不腆杼熟之私唯記室存之

答武岡王

伏蒙殿下下教賁及幽憂唯是隕越荒迷之人無所比
數不祥姓名輒敢以瀆鈞重悚息悚息先大夫之有事
大藩廿有四載矣殿下見稱若新憫卹冤酷以命孺子
孺子死且不朽拜啓華集忭被雄風小山金樓瞠乎其

後復徵睿旨有意楚書俾魏余二君子總司其凡仲蔚
公瑕淳父嘉則為佐紀纂不唯七澤吐潤二嶽生色蘭
臺渚宮之間幾復聞屈宋唐景輩珮履聲矣淳父似終
不能強仲蔚雖苦頭風簡出感知已誼重或可從史長
裾一登醴筵也歲暮卒卒垂褰先事不克覩縷統祈鈞
亮書刻數種附覽不宣

答西亭中尉

往結髮游燕齊間則聞大梁有西亭公者河間淮南其

人也不佞私意得如枚先生絀漢官之好一從事於雪
苑夾池卒卒未果而會故人許殿卿者為梁史因托一
致聲門下乃門下不鄙夷之辱賜書所以慰借良厚讀
殿卿海右集序復拳拳焉唯是二三兄弟跣弛之跡點
人齒久矣門下何味乎其名而舉之也不佞凡所從故
人所見門下詩若文者三皆佳絕至奉教札及序刻春
秋傳而知所嗣於河間之聲不誣也僕於茲道雞肋耳
家既無遺書足讐所裒訪十不得三四甚媿無以應門

下舊有論著係春秋者凡四篇一得之見幸憐其愚而
教之殿卿便便酒態似山巨源又得普師游戲三昧久
計當益入扇頭之詩聊見仰止新刻二種少塵清燕不
多及

與棘寺諸僚

貞無似幸以職守隸貴署辱諸君子不鄙棄屈年位而
友之使得廁末從之末席惟是不肖之身承君子之下
風歲奇半矣入則貳騎出則後先假以顏旨縱以談笑

師師怡怡削廉破隅使貞得忘已之賤而以拜諸君子之鉅惠當事者念需次久俾得効一職寄跡焉遂與諸君子隔也初亦意棘署雲曹相距僅數舍許念邇室之未睽慶爾思之足慰而別且一月矣司寇嚴稽覈升散之期迫于卯酉案牘縈擾數舍之武不能屈諸君子玉趾又不敢以望舊游之軌每過列棘門據款段輒欲下傍徨久之而過竊稽近事咸損服章為貺益欲佩著曾表毋忘念思然某以為思固莫涯物則有敝敝而棄之

是棄諸君子德也先民之戒曰贈人以財無若贈人以言藉是不揣捐前直易置數番絹其幸毋金玉而辭而以大贈貞貞也領諸君子之訓借退食微燕一展誦焉穆乎挹春風恍乎見梁月朝夕如接諸君子也快哉悚息以啓踴躍以候

弇州四部稿卷一百二十五

欽定四庫全書

弇州四部稿卷一百二十六

明 王世貞 撰

文部

書牘二十四首

答虛齋王中丞公

伏審峻陟中臺保釐東土三十年公輔之望今始少稱
慰縉紳間也特某腐儒未解事不敢以為門下賀焉自

上赫然攬威賞大有所處分有司宜惕然日夜茹膽席
藁自淬勵而今又三年矣縉紳先生靡不開口談兵食
也而未有一事真足裨人主不過削天下之財以供無
益募天下之人以食餘財甚或借縣官之喜以弄恩乘
縣官之怒以張威耳敵至則頻蹙而憂身敵解則揚眉
而冀擢此非特亡念國家事也迺其智識罔昧苟且以
為私計亦拙自雍并兗豫幽冀青齊間亡不召募疲供

億移家徙矣昨又聞有白梃挺殺令者此豈特漸已也
上下人併心力謝它役而圖其外猶不足尚可益中潰
哉萬一難作澤中拉然土崩誰為支者山東喉領也難
作其勢日益重山東之勢重而執事之身日益危展布
日益艱某不佞願惟所以稱是三十年者敢從效一得
焉夫臨淄即墨諸槍手鑛人多奸俠亡命伍也白蓮之
役恃而勝得无易我耶給事曹郎所集兵匪乏勇也以
為兵則不勇以為賊則勇宜急慰收之母得令他豪傑

用也更望下教戢郡邑守令時百姓之力安靜填之母
令易見亂臨清大賈沃饒垂敵涎久敵一入紫荆飛騎
馳奔若迅雷旦夕傳城下舳艫接甬千計得晏然哉請
毋謂遠不至也城下之師誰則料入哉某切因家君以
羈孤之迹蒙主上不世之遇而授之以不能稱之職撫
心衡慮悚然在衷妄有所窺想而執事鄉大賢長者也
家君則何敢望所造似之矣故因而獻其芹曝其少賜
清間之燕一進而誨之

奉樗庵先生

自執事罷朝之薦紳士夫莫不憤恨愴惜彈指側目於
當路之下石者而不敢抗一言於朝夫天下事所以日
就於頽敗壞散而不可支持此正由公論之在下而猶
冀其足以挽回扶曳不至於一國之若狂者亦在下之
公論也夫在下為公論在上為公法公法立公論行而
不顯公法亡公論顯而不行執事罷僅一二載不惟行
者絕不可得而所謂顯者日漸以微而憤恨愴惜之意

亦日漸以不振矣此關係豈直淺淺已耶古之君子一時之事業天為之人不能限之後世之事業人為之天不能限之假令執事在砥礪服官居職即不拂民以從已能強已之所不可以從上之可耶即不納勢招賄能禁它人之盡无招納耶即不昏夜踵乞遷轉之際能一无叩講而自遂耶又能喑默陰重隨變態之百出而噤絕无一言耶言之絕无禍耶又能為忤賊忍害之行殺人以媚人耶此五者人不能強之執事執事亦不能強

之人而欲其無罷或以罷故為憤恨愴惜誤矣今而後
田可農親可養聖賢之書可讀未老之年可以奮發而
精詣此四者執事無求於人人亦無望於執事而又何
病焉故僕謂憤恨愴惜愛公而不知公者下石當路為
不愛公而未為不愛公也僕愚鈍无所窺識然於父師
之教側聆一二以為有濟世之心者必當慎其跡有高
世之跡者必當降其心夫不量已之不能夫子而見南
子不量已之不能柳下惠而與處女宿嘵嘵然而議也

營營然而行之曰吾以遇主巷耳吾以納約自牖耳卒之巷無所遇而牖不成納僕未敢遽議其心然亦未敢遽是其跡也或見與時左遂奉身而獨潔或勢與念拂至直行而蹈禍曰此足矣世莫予及矣且以為糠粃且以為草芥而據益峻視益廣行益怪而難企嗚呼鳥獸不可以同羣我豈其異類耶僕又不敢信跡而遽與之也惟執事介特之操溫恭之度消融於學問體驗於身心務實戒名近裏達表於二者之病了不相涉故敢畢

其愚而請正焉新拜帕茗及披手牘之惠諄切相勉僕志習汙陋牽迫雞肋之感特不至叛名教作小人它日從門下有地耳山居希為道保愛不宣

華鴻山學士先生

伏審疊茹荼苦扶服襄事某雞肋塵守不得奔致生芻之哭僅從諸生後一效執管微勞然於先府公懿德未能少益寸尺愧間忽辱手書厚惠雝然在疚不忘几函之迪唯有感佩而已計踰祥孝思當未紓先府公夫人

享有上考物志易戚終始儷備人理罕復遺憾天下之
身幸自抑嗇全之某竊祿浮湛如昨平生於泛然應酬
上不大能有情而頗亦好習讀諸老先生書然孤陋未
盡解也獨時事感觸不可言募人積粟未克刷城下之
恥而中外晏然輦綾錦益之互市之馬方來甘泉之烽
隨繼今莒州賊執同知滇土夷殺方伯羽檄交馳名實
俱盡瓦土之勢匪直已形特俄耳時旣甘厝火之薪某
恐不免破巢之卵也家君病體綿質一時之偶遂服重

寄其間掣肘觸藩每一念及若負芒刺非師之愛亦何
可塵瀆向熟岩居諸稿真足名世我師不罷官不過八
座已耳試問今八座疇可達素而自表千百歲後亦復
誰有知今八座者世途荆棘動輒由人唯此事差可自
力愚雖不敏願從執鞭冀念門牆之末俯賜提策亡任
感切使旋聊此布悃不宣

又

再辱書一拜白粲之貺岩居稿落落莫莫故義熙人語

也某倦風塵中輒焚香諷一二篇爽然自遠時從南來
人得起居蕩之役甸人從鄉子弟陪白梃裹饌角賊甚
苦彼亡所甘心焉童圃赭澤矣而不能加先公之廬歸
如也敢以為吾師賀雖然彼或者萃其怒而仇我盍移
室哉賢器清令復蹈有司真宰所吝靡闢人理不佞請
毋束濕而時優之使不盡意當自距躍三郎君比復何
似不能不懸情耳老父入春軍事委頓鬚髮改色某近
者尚書舉故牘便以省刑見命猥復周行輔郡簿書自

匿餘亡可為道者出入神明良飯自愛

王稚川太常先生

師行後兩辱教言且領至意欲具啓走使奉候而且謂
秋前未抵雍也發且止數矣某自入五月來災疹洊羅
一子娟秀奄化異物旦莫泣損忽忽若失得以淮役擬
托便還吳下少尋故游浮湛幻身而家君取快嫉者復
有浙師之命驅馳危險委質無論在某敢安且家濱大
海與賊共之彼少見迫驅此便嬰焚掠歸僅旬日欲奉

老母避地閭闔卜築未果報期尋逮黽勉北行萬事俱廢舟中稍謝它累用紓鄙忱左右且見聞一二請實焉邸報知大將事露矣天子追修尸籍其家示遠近東海波臣竊自驚喜以為賴宗廟社稷之靈決疽去瘡亡損支節此非人力所及也當今國家威甚振所可慮者不在難去奸而在易用人外兵帥時陳似矣而共事乃一白面老公又京營將統袴子也其人知識勇幹緩急可備否一二元老共戚休股肱腹心之寄生不能為縣官

百口明巨奸因其役從臾之又無以善其後何心也二
王出留旨下乃定海內心婚學大典次第舉行正根本
絕嫌疑遠近大小靡不加額誦聖明第講讀之臣亦有
以敬皇帝時政告者否師名德重望樞握有日杞人之
憂預以相質幸與而教之

答王新甫

萬里將書兼攜巨帙良悉所謂甚厚期僕也僕何以當
之追唯曩游殊太草草獨以一二語下愜鄙衷瀕行投

贈聊具仰止何能少重行色不意蒙記至此能無汗顏
執事程則班史揆藻沈宋翕然將一代之盛而又官嶺
南嶺南山川奇秀宏麗稱天下其所當於耳目而益於
衷不淺將必有的然傳者幸毋靳誨僕也京師交游政
難與語朝夕僅一歷下李生黯黯古色當遠出吾人上
陸沈散署足占世態矣來書以家君擢賀未究深愛所
存去秋偶緣城守便得超越衆非厭服行能聊相慰借
今令周旋寵貴乳哺悍驕劇慮窮巧未尋要領執事倘

一體之必見恤也如僕又何語退非子傳進非以言尸
祿觸藩慙顏如甲草木等耳何以自樹自見哉人去急
附通起居別書扇志懷請教照入

又

僕受質偏駁往守獄吏緣責多忤謬以資薄從諸大夫
後躑躅東土白跣之區也銛矛三尋攢若鄧林杯酒失
色白刃霜躍即不肖覩顏之息以寄士民上旦夕危漢
法中耳以故匿不敢通其厭棄之姓名於故人也乃使

者從傅中丞來則將足下尺牘疊疊記不肖如昨足下
長者宜爾僕於文章鮮所規象師心自好良多謬鑒然
亦以其奪之故不復能治申韓家言胡以得此稱吳君
也豈吳君與足下亦遂有昌歎羊棗之嗜未瘳耶足下
娥媯令姿飭以規矩調伏其氣與時抑揚海內薦紳大
夫言文苑者誰不領袖足下也即忌人又誰以一二酒
食之事指足下者然竊聞足下尚少之益日夜刻劘性
命之蘊講求經濟以求太上所謂夫黃鵠遨翔於天池

而不賤斥鷃丹穴之吭雄於九霄而不薄蟬翼此更難也足下又亟稱吳明卿固無恙哉尚能從足下游乎青衫如鶉八口微祿即不遂自決為溝中之斷者安能不潏然向繩墨也足下念之固喜如僕乃簌簌淚下矣濟南生傲吏關西嘗三以其文若詩來承欲得其耗故附以聞卒卒不既所懷亮之亮之

又

嚮者傳中丞人還則具一啓及以覆瓿之言侑也至於

今不奉繩斧之誨將無去人浮沈否所從游者翁朱二
方伯咸以習足下故再三口政術不置足下之亭於官
宜爾世貞齒頰之餘坐卧鋒鋷困以刀筆為湘中之累
久矣不自意再逃簡書政為老親躑躅虎口進退唯谷
踽踽笑人于鱗足下何以教之惜哉明卿負諸君子推
轂稱不罷故以坐廢也文章之途日益荆棘筆路藍縷
以啓山林非足下誰托也

又

與公張園痛飲時十六改歲矣待罪青社鱗羽一掇浮
沈異天間者濶焉即不才所邁會不敢望稱人何至作
官量移貴省擲身案牘中忽忽忘其故吾矣教翰飛墜
恍若覩紫芝眉宇及稍讀辭所云知儼然在疚猶勤存
故人高誼乃爾虎丘步武之間竟成間隔盈盈一水亦
復何怪僕此出真畫蛇之足但中間有大不得已者進
退躑躅觸藩一羝可歎可歎縣官方急材黃金魏我日
購枯骨而千里之足乃放中野所未解也知不足膺公

懷聊及之耳公哀戚至念純一不已天真自露外境皆假佛法所稱證無生忍亦此意也不知諸大知識能首肯否非日當效生芻之敬先奉謝因布鄙忱伏惟照亮

朱客部子价丈

壬子冬道寶應里中儼然龍門也忘其少且不敏而輒進所欲吐辱長者收之小友矣已論報還值有他出弗果謁然邑臣致二行卷捧之如和璧隋珠從天下也句吳諸少年過從索而指賞以為祝京兆且復出矣何期

一卷遂有長康之化迄今咄咄抱歎也丙辰從家君所
兩扇頭之寄昔人所謂煥若神明頓還舊觀良不虛耳
執事吸月露間齊梁又所與倡和相慕說者為博南山
人也世貞晚進於詩無所解然竊謂博南山人固博而
多組織之語不能如執事清婉天致自發其言成一家
云執事得無難之否執事之視宗生世貞丈人行也渠
獨以幸數於燕市奉杯酒抔揚風騷世貞削跡海邦寢
處蹢躅矛盾之與交而案牘之是耽豈非命哉日者島

寇陸梁淮揚間將無識康成里否發邸中報見公以不
赴尚書期應公謫也非修我牆屋故耶屬家僕還敢以
布其區區別作請正何敢異玉案之報八寶書屋中有
賤姓名足矣

與李東昌

幸緣玉倚忽爾萍散言愴離索令人自失曩執事五馬
就駕體中憤憤遂阻招提之餞更承不棄遠飛教言計
履任已久上下安和逢迎案牘咸目牛游刃聽折之暇

或登樓望嶽或省駕齊墟付餘解於歌咏體至景於丹
青宛然一風流太守也弟日坐省中譬若籠中之烏毛
羽楚楚顧影羈牢雖效悲鳴誰為釋去明秋或可得使
事道經貴治叩門索飲政恐太守威儀嚴重閤人不察
謂是游客漫逐之耳于鱗峻伯只如常此間最難得與
語便附聞之足下所有雲谷樵者否為我指其口曰但
宜進酒

又

執事郡當孔道攝吏百計攬聽逢迎歲月謂少而能片
言取折分身應酬又復遊戲丹青縱橫詞翰萃成卷帙
惠之故人豈惟文雅吏術兼至無遺一丘一壑猶可想
見高致也僕迂疎質相世態本遙強就束縛隨人笑語
邇來聞有覈察倘緣此得解便還故吾但家君連被委
任事勢匪輕進則虞身退猶歎報烏烏之私中夜芒刺
執事舉以見賀意猶未悉僕也自執事言離雲司變故
叢沓遂為危地僕雖未膺厥責亦復何心將來日浸日

溺難究結束一著浩歎而已別來偶手談竟能勝袁宋
諸君此可為告

寄凌汝成

伏時周還臺使者海上也屬苦吏媚摯且蒸熱卒卒以
故報書不得有所傾吐既發則時時念大雅不置也從
長安中發郵書輒問執事除命不得甚恠之以為嚮名
氏則再三聞公車矣將無執事厭其高足耶家人從南
來具尊公及太夫人起居狀良慰賢兄忽遂再暮每經

黃公酒壚不能不興濬沖竹林之歎計執事猶甚寄哀於人琴也其孤比習其書否青州日飲食盜賊而處無所復言新南康推受事何如貧甚無以為投劾地世途拂息往往礙人執事幸委曲成之世貞旦夕且歸矣勉旃自愛不多及

答徐汝厚

兩辱翰教及海物殊荷遠意昨見竹隅公云足下苦公分相逼且朝夕計饘粥不意諸生時此乃佳耳士大夫

最受病在求與諸生異與諸生異不得不作盜跖吾州
前輩固無如足下也某自入散曹來稍稍靜思即嚮年
與足下相處時徒以浮氣待人以易念待事以麤心待
古人書以滿意待詩文終無毫髮進益且得罪同行不
少也來教云洋山治蕪湖稅極不得已昨聞洋山固欲
辭之又非也東西南北惟上所命我欲潔身誰當其污
者君子自盡何如耳想當不復然矣

又

昨始得袁舍人書及蝦米向兄發東時謂此當最先到
既乃最後到可笑也僕循次作一月老獄官長日宴坐
殊更憶孺子風度不淺淺今冬北來謂可續舊時語笑
但歸思益憧憧地茲期或南遂相牴牾亦未敢必也惡
詩一聊錄去僕邇亦頗微解獨於贈寄執事甚加意而
甚不愜想是執事緣薄又不知我緣薄也

與岑給事

世貞自奉先君子諱杜門席蒙者七年矣春初天子需

恩詔與天下更始不肖方有霜露之恙匍匐而北白見
先人寃狀俟命國門之外而是時數從郎中吏傳執事
後先所上疏讀之諸剖析利害持國是搏大奸以為無
減於長沙敬輿之識私竊偉之至舉逸一疏中間誤及
不肖若有豔於雕蟲之技而加之拂拭者執事豈有所
過聽於人謂牛溲馬勃真足以備毫末之用耶不肖束
髮時即冒朝籍其時妄不自量亦欲效鉛刀於一割而
不幸與用事者忤馴致大變震蕩摧裂之餘此心已灰

久矣七年中負不孝之罪不敢自比於人而今幸執事之疏與廟堂諸公之力先君子獲從昭雪不肖兄弟稍得稱人於鄉井間即國家復過聽以一命見縈不肖雖懦不得為嵇侍中亦何敢偃然而自附於偉元之節哉燭之武曰臣之少也尚不如人今老矣田光先生曰太子聞光盛壯之日而不知臣精已銷亡矣不肖之所以逡巡而不能出者竊用二子之言自問而頗有所驗懼以知人之哲累執事也昨復讀執事救周太常疏令人

歎服度非北垣諸君子所辦區區一得之見蓄之久矣
敢以聞於執事大抵今之稱大臣者類多內顧之念而
不肯為國家任事今之為諫臣者各欲自靖其志而不
肯為國家惜才且與其易而退之母寧難而進之今主
上固寬仁恭儉不忝守文主然頗勸於萬幾而左右之
道諛者其兆已大露即遠無論元祐元豐近不見正德
嘉靖初事乎正德諸中貴人弘治諸君子激之也嘉靖
諸新貴人正德諸君子激之也此意唯執事可以奉聞

亦願與同志者相為慎重而已不肖不然之仄無能為
報第先君子入土即縱身散帙中作老蠹魚送餘日苟
有微見於三氏之旨勒成一家言毋負執事門牆足矣
先狀奉覽并粗薄儀將下忱統希照入

與尹御史

嚮者霜節東臨世貞側伏田野第從今耿中丞所得公
風猷一二私心豔慕之今春不肖兄弟奉天子恩詔甫
匭北上為先君白見寃狀而為用事者所尼躑躅國門

之外復竊從邸中吏窺公婁上大疏隲核賢否綱紀國
是隱然有古賈陸風而最後乃誤及不肖兄弟豈以障
尼胡祿足備鼎俎之用抑憐其淪落困躓窮極已甚將
收而拂拭之耶不肖身所當憂患類非人間世所有徑
寸之地灰燼已寒即冒昧強出必至跋胡疐尾供士大
夫笑資上負國家再造之恩下累執事二三君子知人
之哲唯期杜門築坯於丹鉛之業少效區區庶幾毋負
門牆而已天地鼎革明良一時政諸君子大行所學之

日不佞乃復有隱憂焉敵氣日熾兵食日詘然此猶在外也今萬幾漸勦百孽潛伏言路微枳遠則熙豐近而正德其兆已大見矣廟廊之上與臺瑣之地何以待之執事幸有以示我使野人得安意畊釣不勝大望不腆先人之幣少伸下忱并先狀呈覽統祈鈞亮

寄陳司理

某嘗讀史如徐孺子之流其托寄若無關世者然一遺府主之辟即不應猶終身北面焉古人不以知己易感

恩其意固爾也乃某舞象時則以雕蟲之技辱知於長者其時實懵昧於人無所比數然執事固已誤知之而不佞亦繇是得補校官弟子以次獲升斗矣奔走世路十餘年竟無繇南窺衡湘之境又不獲走一介致咫尺之書少抒區區之悵而旋遘家大人難摧剝震裂幽憂怠滯之餘其於生平蹤跡忽忽若無所識者近遘天恩曠蕩扶病北走伏闕上書冀白見先人寃狀邂逅賢從子太史公於都門之外始一聞執事起居恍若啖火棗

而爽然悟三生者使人愧汗津津然下太史公又亟為
言過庭之於所聞於執事者不一執事豈尚以某猶夫
哉彼孺子者則何人也吾郡自辱惠於執事二十有五
年矣其風猶政術雖間井至今能道之而一時不能理
於操切少年之口然其人往往漸盡灰滅無復聞於世
而執事方健杖屨無恙日夷猶於武陵桃花間猶以其
未竟之畧發之於太史公所謂季之所得孰與仲多此
語知當不滿執事一笑粲聊志鄙感耳茲具不腆幣儀

托太史公上之記室拙詩二章書扇頭請正執事能無
曰孺子可教否南中暑溽強飯自愛不一

與徐叔明

昨在九江有數行附尚兵憲通候不知達否弟以畏熱
廿二日始抵省兩臺諸僚雖見愛厚而此間禮節頗繁
衰顏罄折顧影內愧且履任候臺者踵接牘吏環繞旅
酬交錯又入棘在近強驅作老博士弟子興寄都盡不
去將為小祗園笑人矣每見諸公談吾文風雅使人忘

倦又云吾丈亦時時見念豫章紫氣中有同此苦懷者
必非他人也諸公急欲得吾丈來見代為鸚鵡黃鶴增
色亦有意否為吾丈談此苦而以相要者熱海中亦自
時時甘露洒也一笑一笑五更起作書目眇數誤竟授
草小史景象當何如餘不盡

又

使來拜手教叙致契濶旁及風雅間以澹辭恍然若寘
此身黃鶴大別與公對語也紀行刻老手縱橫道句逸

發正如右軍五十二以後書若江山之助固不足言矣
入楚稿便自作小巫頤頤齒牙芬流鏐出故旗鼓相當
羣公之言豈欺我哉弟勞苦視家君數倍而飲啗益進
不困夙夜星數之說信有之馬曹事少簡更托須臾其
中償文進耳湘楚右轄神僊官府稍為戎籍係心以此
送日亦自佳政府注意維桑仗鉞之命當在不遠然中
丞方在事似未肯輕移也中丞見念之深便間幸一達
之溽暑南中當益甚加飧自愛

與陳戶部晦伯

不佞生獲遺足下同世後先通朝藉垣省相望乃不獲
一並薦其長稱國士交抑何奇也既足下屈為外臣得
吳郡而僕已久棄田野間乃足下不鄙收其麋鹿之跡
而賜之友結襟帶握杯酒揚扅千古隲核二次以求太
上抑又何遇也僕於文章無所推讓顧不自憚以九州
之外六經之表不得如阿難耆婆者為之總持中國區
區雖倚相惠施亦不甚多見使三代文獻寥寥焉抑亦

諸博士師弟子少置力耳夫豈獨秦王李斯罪哉今天
下幸而無挾書調言之禁甫離齷即從事學官顧其所
習僅科舉章程之業一旦取甲第遂厭棄其事至鳴玉
登金據木天藜火之地者叩之自一二經史外不復知
有何書所載為何物語令人憤憤氣塞休明之代士大
夫談性命者創不根之語蠅集蛙傳以文其陋而矜然
欲主齊盟即所謂驢非驢馬非馬龜茲王乃騾也其稍
上者即操觚之士攀西京躡大歷厭薄宋儒以為不足

道實不如宋儒日佔俾小有所撰述也即所謂夜郎王
謂漢使者我孰與漢大也不佞少小時竊以托附長者
之嗜顧不能沈思有高陽涉獵之病中年好酒懶事時
時自廢然意有所溺竟不能一日離之居恒謂三日不
飲酒覺形神不相親一日不開卷骨孔盡窒罷歸田為
鄉里小兒項領所苦忽忽寡酬以故每一遇足下輒便
欲傾倒別後與家弟言之猶媿媿不置也家弟亦云目
中未嘗見此人幾得之奈何失之尋足下遷留省為僕

言且有旬日留後六日僕走一介跡之擬挈簞榼嗣其
後以稽從者則以先一日發矣足下如無意開府吳會
野人足不能及百里恐此生無復握手當恨曩者之草
草也足下勉旃自愛聞結撰已成垂勒不朽世無慕華
林編要高孝標者殘膏餘馥能見沾否楊用脩自謂近
代子雲見足下聊蕭之僕初未敢奉從然覩其書如方
城萬城張浚張俊三尺豎子所不道者何也近有致河
南通志者名宦中相州刺史高陽王雍魏孝文帝弟也

以孝文戒益自勵今作王雍高陽人此又大可笑也今世所稱博學知名士如此僕又安能舍足下乎勉旃強飯自愛

答陳淮安王叔

自嘉靖中一再從蘇山先生燕邸而最後先生外遷吳明卿氏來言曰夫夫有子矣是少而敏楚材也亡何而聞公成進士已又從家弟所得公詩今乃又得公文矣公於隆慶中名滿長安乃厖厖一守操觚之士亡所藉

以生色然淮揚股肱郡治理一切流聞璽書褒召當亦
匪遙循吏自可亦何必寂寂文苑哉來教不惜齒牙餘
芬以僕一二狂談有足蕘采進之引玉不佞於公文無
能為役顧管窺所及謂公實自正宗發以竒藻意融法
中不出法外汪李之後罕見其比故不辭而僭為之叙
自忘形穢之誚也公能為我藏拙否先太恭人賁大些
兼拜牢帛之貺銘刻玆醇惠存種種吹暖於灰援骨加
肉何以為報使旋聊此附謝諸容嗣悉臘寒為道為天

下自愛

又

得尊公書知門下初以一介走我於家而不值也乃更
凌大江而上及我武昌則使者足重繭矣啓楫捧咀有
餘思焉門下盼睐千古而肺腑故人乃爾僕故深幸之
惟恐其不得當也家弟獲遂同汎不減元禮之游僕每
出必悔悔又不能無出非人哉茲行雖一與寓目江山
之勝衰顏磬折奔走委頓以從諸少年後無地著面強


自力入棘即文事叢委之矣垂老於晉楚間作博士弟子真前生業債也已具乞休疏托舍弟上之不知當如何耳佳刻華織謹領獨青州從事作烏有先生楚釀甚惡幸所攜足朝夕不然不能無望於使者也新詩琅琅郢雪之致奏之黃鶴無論玉笛令梅花盡落矣漫成數語以謝沈嘉則魏季朗諸君從門下游甚善然渠輩尚以多彈鋏之歎也尊公秦音鳴鳴為楚生色他文多竒知當未艾方苦頭風飲藥不一

樊侍御

某一二從酒所奉顏色雖往覆亡幾而傾吐特深日者
拜命之候方苦渴疾匍匐通姓名門吏不得一捧別袂
中懷怒如使者攬轡而陟太行之顛慨然有餘慕焉墨
吏省已解綬循雅之士爭自刮濯以庶幾下風來諭似
有所未足卷卷叩攻於頑石胡長者乃爾某不佞聞古
有助於人者牛溲馬勃亦不卻也乃其所助則非牛溲
馬勃比也順德李守於執事屬吏也即亡論其文卓犖

趣古某故同舍郎私之謁省中歸炊脫粟閉門謝客書聲竟夕矣母來自歷下就視畢數日跨一羸歸不敢以煩縣官芻秣嘗謂蒼頭歲除矣安所得酒持敝緼袍東家質之某幸有餘奉推之不數數受也比跡其守郡率素亡毫髮改日一肉奉母耳妻子更日得少鮭菜耳吏民謳吟戴守若父母而頗以文法左往使又不樂除道積糒待非常之客客亡為游揚者僅雞肋牘末耳令李生伏鹽車上羊腸屈足就秣御園鞭箠而拂之固所安

也伯樂過不視乃始慙然驤首嘶鳴矣執事視李生何如也毋令海內有以御園窺伯樂者



弇州四部稿卷一百二十六

欽定四庫全書

集部

弇州四部稿卷一百二十八

詳校官侍讀學士_臣陸宿焜

中書_臣劉源溥覆勘

總校官原任中允_臣王燕緒

校對官主事_臣陳 墉

謄錄監生_臣張 健

欽定四庫全書

弇州四部稿卷一百二十七

明 王世貞 撰

文部

書牘三十首

俞仲蔚

春時附一詩及書知當達也賊益深無復下理貴人悉
海內兵攻之吾恐遂一擲耳仲蔚佳士顱肉作青精氣

何可着賊手無力不能挽夢寐仙仙耳仲蔚知吳明卿
謫耶坐以談文章故當事者幾一網盡然謂僕乃其魁
焉所深恨僕則以左右死者常自厭恨業障不自割斷
借人了之明歲夏初可長得奉仲蔚也日坐樊籠訊謀
滿案作生平所無態苦甚苦甚武當笋風格袖領簣簣
昨過焦副使者雜油及蒜烹之一見欲嘔不覺匿笑此
笋亦遂當笑吾也人去便聊以問仲蔚

又

前入吳見陸子傳先生僕欽其歸甚高又丈人行也頗
與僕論詩僕舉足下似之渠云甚古雅少瀏耳僕謂瀏
政是吳子病故不應識足下耳今奉去素卷一冊一欲
足下書古詩字倣錢大或遂多得數章近體亦可二三
鄉居極幽寂春來卉草種種又多海魚新菜差足奉也
足下興小佳便從藍輿舁來醉花下矣京師稱謂太厭
人僕與于鱗輩稍稍去之因呼字然僅施三五同志他
友生亦遂字吾吾不許也今以謂足下亡訝也

又

邇人回附短啓并令家僕微有所助不知得微覽否念
仲蔚園城中寢食不寧天下大矣仲蔚故不渡江而北
或西從楚蜀山中樵採了此生奈何寄要領鋒刃間耶
事大槩已可見僕為老年銜上恩北門之托君親分深
不忍棄去耳不然僕豈嚇腐鼠者即黃冠胡難哉昨與
宗臣吳國倫約平生所著述人書一卷相授以備卒然
不可奈何所得仲蔚篇什雖出妙翰恨未悉今顯人需

仲蔚平日詩亡論卷帙幸一一寄來秋涼當手為詮次
來歲倘遂乞外付之梓人以比於名山大川之義仲蔚
母過自抑南海梁有譽亦五子之一而今死矣海內僅
覺李守縱橫逼人僕極兵力彼猶黃池之盟吳子我耳
然舍僕恐遂下風也當發仲蔚一笑

又

三得足下書良至猛虎吟前無作者昨見南來人冠似
小緩然數十白手叩臺城橫殺將吏從容歸其大衆彼

不肉我哉久計以江而南與賊共之幸彼中乏英雄耳
閭門中諸小兒塗抹倚門便自相國色卒然問足下無
知者如僕固益不見齒沛父老習見隆準公酒態謂是
風老公十日高會咸加海內始相驚一亭長作大舉止
千秋事業豈易令齷齪書生賞哉孔嘉亟為吾稱某子
甲吾數從人間見其詩末也此子風神小可耳便令侍
足下十年不作雪山苦行終落聞見宗耳前書邀足下
拔家而北恐未易又足下惟房之好不輕復當且止全

集何時付我世貞冬盡當得三輔讞獄使者十月可了
徑歸卧矣濬人盧枏賦手張左亞也足下物色之否

又

數辱損書勤篤備至題扇一章恍若偶坐清颺自流梁
生遂致全帙息鞅精蘭稍就披卒愧於足下無測高深
愚不佞妄謂名世語不在廣如五七言古正始之音出
微入妙近體小有散緩恐一二微瑩不無連城之累耳
赤牘委致義慶若在當令絕倒序記如馬遠山水圖類

雖極人工終乖天則敢取十八付之梓人敬俟來命足
下謂僕所云高士贊欲收仲長子卿非也乃子光耳語
見文中子中亦有前史載其度格足下偶忘之耶幼安
龍德而隱變化莫測高士後先此其翹楚足下意若有
不足而收之者非所敢聞也幸自惟急須入集耳別紙
聊杼塵思以答來美當見揮斥

又

盛氏兄來辱損書及扇頭三絕之贈良悉來美郡非孔

道遣信不易故於足下殊若沈簡精神之思托之夢寐
耳老吏平亭粗所便習雖酬訊匆匆頗有隙日以薦詩
書世人貴耳時便齟齬而僕受稟偏駁不耐杯棬乏博
山悶溫之口而多中散箕坐之骨加以仲舉犯上之性
自附陳容同日之志讒間所積遽成丘墳當事既擬肆
其蠶心慙患何緣亦側鳩眼臨發之日尊慈婢媛親暱
丸瀾謂僕都謝筆硯逃形案牘入齊以來磬折熟矣亦
能粗語滑稽佐酒醢矣昨者上計吏還言朝堂內外盡

為煨燼寇跡所至河流欲腥家君僇力矢石橫拒出塞
幕府上事翻被鐫削北風甚勁南幕多烏又聞樵李有
數餘皇西則秦晉敗堞改阡心膽尚裂東則青兗大俠
亡命骨節盡痒生非其辰默與變邁意氣所發亦欲淬
礪鉛刃仰希一割之用既而唯之手趾束絡躑躅何所
昔人有言吾不能為千古笑端也外則念玉石俱焚之
菑內則顧巢卵併及之變坐是竟食而三廢著終寢而
九起嗟也靜推陰陽消長之會臚數史籍盛衰之跡往

往符驗而僕最不幸心所不喜乃復得之明興裁抑門
第寒素雜陳而僕家乃六卿二人監司守令紆朱綰青
又不下數人此一徵也幼藉尊君之庇不耕而菽不蠶
而帛出無步趨日享再肉此二徵也束髮被薦踰冠登
朝隸司冠者九載而不被一謫今又猥賜金紫矣此三
徵也心所欲語口輒能導意所欲筆手輒能副譽不及
閭里而或鼓舞遐徵此四徵也雖使足下為僕解之何
以解也不佞三月之間蓋以歸計陰請於家君再矣而

未許曰汝其置余何地哉夫少也學未成而遽倍君非
所以處也且使長者親戈爰之役而衛其子弟彷徨於
鷄狗之社可爾僕敬謝無狀因復需忍待罪東諸侯絕
旦夕之請抑鬱惻結而不得伸聊取夙所著作粗加編
定詩自騷賦古體以及近代文則繇序傳洎雜著往往
畧備人苦不自知薦醜百代以期偏嗜亦良拙矣即不
量未遂溝壑尤欲賦二京志五嶽續子長不竟之編劇
老氏未純之論九一其流付之山川而所虞如此所望

如彼是將却日再中留望為幾也足下能無笑其言乎
今海內之士家握靈蛇與僕金石要可指數衣冠之雅
于鱗日揭則吳生入室宗徐升堂伯承峻伯順甫二三
君子亦當兩廡山林之致足下擅其玄謝榛脩其短盧
柟采其材王治吹其瀾又聞吳城中有彭年黃姬水莫
叔明者可謂盛矣夫文章之士如韓非李斯班蔡孔禰
潘陸兩謝蘭摧玉折豈非造化之精惡泄人羣之舉忌
擅今日僕念諸君殆不啻念僕也勉旃強食自愛公署

雖囂別有篠室可以娛性足下倘許躡屐僕便脂輒淮口却掃齊門種種之懷尤未竟吐以待更發

又

春時身在人齒頰間又復老親躑躅戎馬之地故作書多憺悶語足下讀之得無訝否陸生竟買舟而北附足下書及扇來甚慰空谷足下歌行宛轉流麗故非凡語特痕跡陶洗未盡去選尚隔一塵耳僕居恒謂子與如醍醐和軟豐腴靡所不入今見足下解帶留連東吳菰

蘆中便自有千古風流令人妬聞此舉淄青大都會也
襟帶海嶽多古賢士大夫之跡足下能杖策而來乎郡
厨雖索然脫粟之飯可以佐游足下無自苦人生百年
里中也政復何益

又

前者辱損書及風雅之貺爾時大人方候不測之命僕
與家弟塗炭衢路微聞嚴耗則方寸崩潰小測寬旨則
精爽狂越無論仰和雖讀之尚未了了尋荷主上多竹

宮之釐且念故劍敝履垂假闇昧曲貸可希餘息復延
驚魂稍定三復尋繹始知足下敦嚶鳴之好信疾風之
勁良用劇心至於攄藻瑰麗詠言幽雋三百之後此其
錦錦家大人所坐輕重行路明之至被搆本末未易一
二數也冀足下知己久當自曉獨僕區區夙心於東海
一書虞晷日之將逮悵尋壑之無機歎文人之鮮永測
功業之難終不幸冥蹈若合符節令僕身當之易耳僕
不憚碎首流腸曲旃之下第恐虎視眈眈坐以好名遺

恨在獄以故削怨為脂柔憤作合勾乞匍匐若贖若磬
用紓旦夕耳日月如照雷雨終解與足下夷猶耕釣固
當匪遙不然夜臺之傍豈少僕一人哉吳中唐子畏每
言河清難俟後世知有唐生足矣僕每悲其意然此君
婆婆率於著述不能逮遠僕雖不才跳梁翰墨間自謂
無讓古人間一開卷至大歷長慶輒興阮生廣武之歎
足下視僕豈戀朝榮者外拙詩一什章十二頗寫所繇
興暢來美豈敢濫續華貂况稱金錯足下亮之而已

又

家人來得仲蔚手書鬱鬱中更不堪讀為我釀淚耳賴
二章一破之筆勢朗朗超著如見米顛父子僕老不辨
事此舍弟頗好臨池便付之作津梁也長公遂棄仲蔚
致悼人琴固所不免亦願達者念有盡之期削無益之
痛毋徒戚戚自苦為也楞嚴圓覺金剛維摩諸經大是
對證妙藥仲蔚兔之書來知走吳門哭子相故孺子千
里生芻也此君婆娑政坐宦薄著書未成嗣息中絕古

語缺陷世界殆為渠云耳世貞飲咽如昨甘泉中奏瑞
日新差得從雀鼠餘息他固未敢希覬

又

昨乞足下書陶貞白傳記已揮灑矣可便付去力僕自
寶褚河南哀冊後偶再閱宋景濂方希古二跋定知彼
所見詹本之為摹或為贋也第恐耳觀者翻據以蜉蝣
撼我又攷諸集不無異同要當以此冊文為正聊識數
語須足下作蠅頭楷以鐵手腕發之令人益想見河南

公用筆妙處當更為大具美食也吾忽忽無暇臨池而
意尚好之一歲來所見獨項氏藏柳誠懸度人經佳耳
字極細而筋骨遒勁可愛真所謂大字感令小者文氏
出師頌有金書御題小玉壺印故宣和物但古法書家
稱蕭子雲出師頌不聞有索也豈蕭書行唐人以絹素
臨摹之自此本應摹而一時鑒定貴臣悞指為索帖耶
緣閣帖內數行小類及後出月儀帖亦章草故耳昨復
見王百穀嘖嘖歎賞舒生進士箴決以為唐文皇真蹟

僕謂文皇集無進士箴其用筆誠精熟然多肉而少骨
後人熟蘭亭聖教者亦辨之不必高品且文皇自為箴
賜進士而以貞觀收藏小印鈐縫甚無謂也余言出二
子意惘然不樂然聲價亦頓減矣何當見兄以比抵掌
年來購集得宋四家及趙吳興凡十帖自謂頗精湯生
裝池時更相許亦須足下一鑒賞懷素千文極合作而
足下不甚篤許不以勞公客卿也

又

昨得足下書陶隱居傳哀冊跋真所謂小字有大法當
自僕評誠懸度人經語發之耳懷素筆故神駿第好以
意創造今人不熟千文或拆看多不可識此禿師妄欲
凌右軍足下大罵之似為山陰吐氣耳宋有張參政者
好作草聖每令其從子落豪至波險處問張亦不自辨
乃曰若何不早言使我忘之故亦宜爾米元章論書云
張顛俗子變亂古法懷素稍趨平淡信爾顛史當更甚
耶今世所傳顛筆劇少伯英殊愁大令桓江州帖或云

是伊書果否然足下罵懷素而推豫章又不可解豫章
自云涪州以後全入素三昧然素結法緊豫章慢素脫
力強豫章弱故自有辨也足下又云性不喜郭林宗此
語的有見要令世人聞之僕日來眉頭得小展過此一
月濁醪妙理盡矣

又

足下遂扁舟送我虎丘當復聞虎聲矣羽王合諸名勝
跡足下而不可得大是佳事第令此會寂寂耳燕中風

塵無面可避然每至談足下與叔平輒自洒然即諸貴人聞之亦悅然自失也初入京幾作衛司馬看殺疲頓不復支今稍得息肩耳而又為文責所苦刺促竟日無復佳興可歎可歎未審何日隱囊煎茶捉足下耳作喁喁也子與明卿雖似解然未可望除目顧觀察須促其上道勿作逗留也

又

久不奉問家人從東來頗得足下狀知杖屨無恙詞筆

益健勝聊用自慰而已弟以三月登太和其瑰壯秀拔
不知於三峨如何要自弟視五嶽琅璈象管斷續雲氣
中幡節婀娜聽如意指揮玉京太清之游當不過如此
也所不堪意者宮觀數十百畫作一家相羽流萬數無
一人捉麈尾作玄語遊客填道誦佛號振耳作諂希福
不減長安市乞兒且以晚顯故遂不得南宋以前人片
詠隻字令人扼腕今所上一賦四記百詠可黏置齋壁
當少文卧遊否年來不作賦既成讀之謂可文考靈光

鼓吹恐亦是老態護短也錢叔寶秋涼欲過此倣王安
道例作圖足下為我書諸篇於冊僕不能令後人稱三
絕庶幾托驥尾以不朽耳所許寫圓覺維摩可就緒否
既乞休不獲未免婆娑山城軍事稀簡罷案之後僅如
一退院僧差有髮耳人便聊此奉候不一

盧次梗

足下四賦恒時某几案間私怪騷辨載胥巫沅澗潤楊
馬物故岷峨改色茲長已矣何圖足下河北傖父千秋

絢也往者計出獄當抵薊門虛左而待者寧一日哉足
下竟舍我而往來邪裏間也以天之靈不我棄也亦得
遂善于鱗此子嶽聳於中原僕亦埏峙於江左后土所
命忘其崔嵬切劘下上無復宇宙楚人吳國倫淮南宗
臣吳人徐中行故南海梁有譽草昧特起偃蹇羣雄獨
吾二人者相慕說輦上君子遂成眈眈握節之日昵友
耳戒出母問訊盧生胥靡也其於助君浮薄名不淺於
乎次梗足下吾自拾人間遺失物何預諸少年事耶按

部過濬當疾飛騎載來並組北首斗酒之後揚扈風雅
身與足下旗鼓相當兔旃自愛茲僕已抵恒陽顓命邑
大夫致不腆之幣筆札者四五人受足下所草賦及諸
詩歌從郵中附來毋見避也

又

騎而追我道傍莽蒼河梁間色也夕與茂秦長揖不作
足下繾綣故知奇人難再耳下衛河飽帆張風鳴榔瀉
流不旬日而抵燕大足暢懷為足下成五詩可自翫也

毋輕令時人見之知復當南南殊饒山水恨乏我輩人
耳勉旃自愛不多及

彭孔嘉

匆匆避兵吳城未展契分不謂蕪詞得挑足下申贈繼
緒遂逾夙交雖形接未數而神晤獨深拜北行一章行
李增色乍入樊鞅數苦公私牽迫不得一致尺牘之間
足下亦間者濶焉每念足下時憮然自失也吳子輩佻
銳誇揚易相蠅集李密未見秦王時態故不少足下與

仲蔚獨持氣格不落彼度內良用珍賞如黃生奕奕風
調過廼翁多矣別作渠遂與足下並稱寧不拍手醉桃
花塢哉寇盜無已僕政坐奔走恐不長見足下幸自愛
眠食外薄物至可收

黃淳甫

吳城邸中獲奉珍吐江夏之秀端自不乏行卷觸目琳
琅獨足下連城耳一行入曹訊諜譏駁故復不少無世
情酬酢種種輕難割斷僕幸不以有情待之對卷便自

入無小罣礙足下相許否賊沟沟圍中知無廢嘯歌數
日變故必多忱慙牢愁之思幸示教一二僕每怪諸君
子好相標稱輒從某家索畫分韻限題組織牽就不緣
性真都略風格孔嘉跳梁亦所不免足下後來領袖其
母作此伎倆也別紙成一章聊見鄙懷足下領之先公
文集刻成否

又

僮回啓篋則柑香襲人以一遺仲蔚一自供至今鼻端

拂拂有天際真人想
飮菜色真如藍田綠玉
齧之令冰液流齒牙
酒腸自滌真大快也
恨乏曹子桓手筆形容
之使二妙沈鬱耳
歲暮劇有山陰棹興
未出門而盡又不及
子猷矣

謝茂秦

別後再辱書不報
豈其冗奪也以足下之未解于鱗故
既于鱗來謂杯酒郡齋釋然矣
且為諸郎君解裝焉
乃某則何敢一日忘足下
曳裾王門醴酒無苦茂秦而知

吳明卿乎不知其闖入五子眈眈虎視也余與于鱗悲歌長安邸中更甚疇曩耳所不醒者梁生遊岱已矣而足下滯漳河二三子復漂轉南北山嶽卒起為歡鮮嗣奈何于鱗亟言曾於游燕集有所雌黃余亦得效一二可即封寄加訂裁為傳之江以南無秘也按部漁陽垂當發傳聊於于鱗布其區區強飭自愛

又

鄒處士張武部來再得足下詩復從問起居曳裾自若

尚平之累都畢不每念足下食指多何以詩飽世貞比
治刀筆多暇即眈眈柱後惠文能撓我一觴一咏為也
于鱗歸言足下騎而追送且百里綈袍戀戀猶故人哉
獨不能如不佞作罷官歌相遺耳顧聖少歌行縱錚大
非足下家也幸規之為深湛之思乎其人今何在留書
足下待其來以授之鄴中諸王藻聲蔚蔚醴酒不薄足
下無苦

答王貢士文祿

世貞東南之鄙人也日者先君子大故不能即從地下
以為千古之人子辱自奉諱來鑿坯塞兌曼謝世路雖
二三故人訊問時闕更用自安而執事獨不鄙惠之書
重見推假謂為長卿子雲復出足下豈有所過聽耶僕
不才束髮時氣豪腸肥妄命管翰輕為撰著竟不闕古
作者藩域而狂聲已幾碎人齒鐸間余髮今種種矣母
能為矣足下幸勿過聽也書到後公除甫畢為鄉里項
領所苦已稍間悉發之益自愉快不謂足下知有僕謂

僕知有足下也藝草雄麗奔逸古歌行其在建安下大
厯上乎文出入莊荀淮南諸家其猶瀕視唐宋乎裨官
家言談名理其表裏伊洛乎談經濟陸賈班嗣之流乎
以足下才若此奈何不令擁簪筆承明石渠之間抗論
國是不則亦駕雙熊汎五鷁用口舌立功萬里外而猶
齟齬旅進退於公車之門噫世必有任其責者足下何
怪足下又欲輯明諸先生文辭為一代言甚盛心也至
謂僕為叙則非僕所敢任僕嘗私有所評其畧國初諸

公承元習一變也其才雄其學博其失冗而易東里再變之稍有則矣旨則淺質則薄獻吉三變之復古矣其流弊蹈而使人厭免之諸公四變而六朝其情辭麗矣其失靡而浮晉江諸公又變之為歐曾近實矣其失衍而卑故國初之業潛溪為冠烏傷稱輔臺閣之體東里闢源長沙導流先秦之則北地反正歷下造玄理學之逃新建造基晉江毗陵藻梳六朝之華昌穀示委免之汎瀾如是而已於乎假足下即不薄此言而姑留之聞

者得無掩耳而走乎僕與足下數百里隔能命一舟見
訪彼此揚扆必有當者又鄙作凡六十卷談藝四卷記
朝事兩種種各廿卷爾時盡出之以佐足下舞劍之樂
足下為何如

又

每辱足下一賜書輒浮白呌舞至醉僕崎嶇歷落與世
長左已矣不快足下知僕快世有足下也今世不能識
一丁人始習雅步談性命文士業操觚翰者又不能通

概時務乃足下獨不然足下髮種種矣而心甚長僕又
安敢自足老死酒食間也劉生間則談足下高態輒令
人欲誦左太冲振衣千仞岡濯足萬里流語兔旃非久
當面亦欲足下一知孔北海耳蒙示大學古本僕尚未
得其說無以復也此書謂自紫陽後始完不知自紫陽
後方始聚訟耳僕以為不若求之心可也談藝六卷頗
匹之鷄肋幸教而正之

與沈嘉則書

歲杪承枉弔以足下歸思迫不能留乃聞躑躅朱顙間
意甚望之張大司馬使所得手書累紙惓惓之屬似猶
不遐遺我也七月內于鱗兒駒以其父全集來手為校
讎畢入梓矣吳高州近一入啓事想不至淪落子與作
夜郎王意謂勝執虎子何肯投効也足下想誤聞耳不
佞入春善病羸然之軀幾復從于鱗後改火行乃矯健
闔門坐苦於歲經閣作老蠹魚三食神仙字矣足下調
我米汁之好緣欲扶衰時或有之小祗園一丘一島數

椽屋百本水木芙蓉水竹日勝當足下所欲聞也露臺如命或七言律一其次聯或可置楣表於足下湖山實境稍切耳

又

足下云水中摸瘞鶴銘可讀者大是奇事此正是豫章鼻祖足下戈法想為一進矣足下又盛稱傾索獲揚州瓊花記石頭城中一催粧詩貴於三斛珠今何至傾索耶此花終為人鳥宮取去朱邦憲嚙語至於玉帝所薦

足下作代人不允大可畏也邦憲遂爾長逝覺吳淞以東無復人風雅俠烈事事在目真慨痛深陸與繩以此君事見脅斷酒不佞謂邦憲賴酒不作四十九年虛生耳九月與子念輩汎太湖登洞庭幽探壯覽覺此身如出天地外歸從鄉里應酬杯酒作劇覓語奇凡中半耳記一首詩三十餘首方付梓完日呈覽也足下為玉叔紹俾叙其文玉叔文故峻潔饒奇思僕何能為役足下計之覆瓿可也長淮限人恐無有能物色足下者不虞

桂玉哉幸自思之對客不一不一

寄沈茂才書

不佞獲從嘉則遊間則誇小阮不置也且曰今此子抱鉛槧而從二三大夫驅於中原者必不後矣不佞因已私識之而會嘉則從足下所來辱賜書讀之即無論其文辭瑰麗乃寄嚮傾注栩栩紙墨間矣豈嘉則亦遂先僕於足下耶不佞負大惜天地間萬事瓦解已久為豪傑士大夫所棄雖然不佞亦不願其更收也伏蚓沸蜩

為氣機見迫不得已而有聲豈以自愉快哉嘉則既已
誤聽而足下復艷傳之將使不佞愧而走耳獨來教有
垂訪意春時倘遂鼓枻為十日飲僕久奪賢叔氏高陽
印章當解以佩足下歲晏海邑零雨牢騷臨書不勝懷
悵

與殷無美書

近於月下登天池山出小語叩耆宿已冒雨聽泉聲還
訪袁儀部偕二三名勝徜徉虎丘張氏園時有少年佐

酒糺輒念少足下一人耳然聞足下於南翔社會中作
風流魁其樂尤甚當不復念我來生更自夷然孔嘉稍
健能劇飲喜以報足下莫公遠持一畫投詩於轅門欲
藉此為南遊計其人足下所素悉且貧甚幸少有以慰
藉之足下得無笑僕復作徐汝寧乎

又

僕昨者欲從足下得諸公志銘或表狀之類以益僕所
有琬琰錄者耳不意乃以錄草來得窺賢者著作之盛

然用是竊有助於足下也計足下不甚筆削其原稿出何人手不雅馴乃爾以僕所知吳文端乃以宗伯學士理誥勅耳後出為禮部又出為南吏部而列之大學士王虛齋先生以南兵侍歸而列之都御史周公詔太常卿耳贈官得侍郎先君右都御史而俱列之侍郎朱恭靖公南吏部而去南字何也僕於國朝謚法姓名俱有之今徐公源無謚而稱忠惠徐公縉謚文敏而曰文端何也其它尚未可指數又僕所知者崑山周公鳳鳴即

康僖子為大理寺丞方直有風猷以公事歸數十薦不起方公鵬以庶子為太常卿乞歸文學行誼卓犖有聲弟御史鳳亦數言事而俱不及何也其次則二陳祭酒一名霽一名寰者雖四品然太學師又館閣舊臣也張石川寰為通政叅議通脫有山澤間聲其父知州公尤高曠有致家兄提學世芳出處大節皎然俱不應寂寂也陽湖先生雖賢然其人尚在而遽為之傳則今嚴殿學劉兵侍諸公俱當傳也足下幸再詳之且請以告張

公吳中稱文獻甲天下母令為少年所窺不一

答王百谷書

近從伯龍所目足下諸篇意竊艷慕之不揣以離資園
為瀆遂荷不鄙金聲鏗然使我松桂生色雲霞更態輒
手一縑步叩玄亭見阻閹者邑邑東返還就伯龍間知
足下善病狀且云於吳子多所避當應門不察汎以遊
客待耳方在傾渴忽走一介以累牘見慰悰托斐然至
於射洪之卷遂奪正始戴山之簫闌入堂室一時得之

便是貧里寶珠良恐仰負暗投至意僕自束髮知弄觚
翰已厭射時調二三友朋左提右挈並驅中原旋邁家
難踰伏草土公除以來忽忽無賴收豎野叟皆得操不
律汙薄蹠相狎雖有酬和雅非素懷遠愧夏侯刑餘之
卻退懲正平尸塚之慟隋寶和璧付之人人掌無私拊
胥不暇反何圖淳父之外復有足下才出一語便足連
城將結金蘭附言蘿栢乃聞垂有京輦之游雄飛雌伏
接翼無期勿愆浚恒敢布私臆大抵北士沈雄興寄多

乏南客穠宛氣骨少柔損益之間是在足下僕且老矣
側聆大呂懸之清廟而已

又

昨小僕北行時謂足下已發矣乃聞朱門有好絃者方
自恨失之而足下書至肝膈累紙及啓所為先君子誄
辭奏之松栢間悲風颭然如和偉元之慟俟足下歸當
百拜以謝也承示倦游之思及所得半偈齋中物大士
想亦為動色矣何況僕乎元老宰公書來相勸駕不免

令舍第一出答其意如僕半殘之軀留置丘壑間異日
可以見先人地下耳別示云云足下誠愛我然所謂刺
刺者似未解人意僕不出乃可忌耳魔波旬急佛涅槃
粗似得之且足下方壯僕安能偃然耶此語可發一笑
第勿令人聞也

又

念昨過足下與足下見過舟中雖兩接杯酒奉談笑然
忽忽多醉夢中語武林山水如畫苔雪間尤自清遠恨

以高車大輜辱之且不欲數數動人姑一再領略且與
私約異日作一芒鞋竹杖緣耳足下更不忘我遠使手
書勤勤慰存軟語清謔宛然如覩眉宇快然快然白司
馬佐江州時年四十四有詩云老婦低眉事舅姑蘇長
公守湖州亦正得四十四僕今其年矣顛毛種種豈復
堪此躑躅足下幸以尊鱸時候我可也金令佳士敬如
誨不一

弇州四部稿卷一百二十七